

VENDIM
Nr.301, datë 14.5.2004

PËR DISA SHTESA NË VENDIMIN NR.294, DATË 13.6.2000 TË KËSHILLIT TË
MINISTRAVE “PËR MIRATIMIN E PLANIT TË PËRDORIMIT TË TOKËS NË PORTIN E
DURRËSIT”

Në mbështetje të nenit 100 të Kushtetutës, të ligjit nr.8383, datë 29.7.1998 “Për ratifikimin e marrëveshjes për kredinë e zhvillimit, ndërmjet Qeverisë së Republikës të Shqipërisë dhe Shoqatës Ndërkombëtare për Zhvillimin (IDA), për projektin e portit të Durrësit” dhe të neneve 13 e 15 të ligjit nr.8743, datë 22.2.2001 “Për pronat e paluajtshme të shtetit”, me propozimin e Ministrit të Bujqësisë dhe të Ushqimit, të Ministrit të Transportit dhe të Telekomunikacionit dhe të Ministrit të Ekonomisë, Këshilli i Ministrave

VENDOSI:

1. Në vendimin nr.294, datë 13.6.2000 të Këshillit të Ministrave, të bëhen këto shtesa:

a. Pas pikës 1 të shtohen pikat 1.1, 1.2 dhe 1.3 me këtë përmbajtje:

“1.1 Pjesa e planit të përdorimit të tokës në portin e Durrësit, e përcaktuar për portin e peshkimit, sipas pikës 1 të vendimit nr.294, datë 13.6.2000 të Këshillit të Ministrave, shfuqizohet.

1.2 Toka e kufizuar sipas genplanit, që i bashkëlidhet këtij vendimi, t’i kalojë në administrim nga Autoriteti Portual Durrës, sh.a., Ministrisë së Bujqësisë dhe të Ushqimit, për ndërtimin e portit të ri të peshkimit.

1.3 Porti aktual i peshkimit në Durrës t’i kalojë në administrim Autoritetit Portual Durrës, sh.a., pas përfundimit të ndërtimit të portit të ri të peshkimit.”.

2. Ngarkohet Ministri i Bujqësisë dhe i Ushqimit, Ministri i Transportit dhe i Telekomunikacionit, Ministri i Ekonomisë dhe Ministri i Mjedisit për përgatitjen e termave të referencës, kryerjen e studimit të fizibilitetit e të vlerësimit të ndikimit në mjedis dhe për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano

